


續文獻通考


百三十四之六





			漢書門
	二	四	
	一	三	
八	一	三	
一	一	三	
冊	架	函	號

庫文閣內			
五	二		漢
函	四		
一	八	三	書
三	一	一	
架	冊	號	類

內閣文庫			
番號	漢	243J	
冊數	81 (45)		
函號	294	13	



七



續文獻通考卷之一百三十四

淺草文庫

皇明進士雲間王圻纂輯

謚法考 總記

儀禮士冠禮生無爵死無謚卿大夫有爵故有謚

周禮春官太師掌大喪帥瞽而厥作柩謚厥興也興言王之行謂瞽諷誦

其治功之詩也 諸侯薨臣子跡累其行以赴告王王遣大臣

會其葬因謚之 又太史掌小喪賜謚小史掌卿大夫

之喪賜謚讀誄小喪卿大夫喪

大戴禮曰謚者行之跡也號者功之表也

曲禮曰惟天子稱天以誄之魯子問曰賤不誄貴幼不誄長天子至尊故稱天以誄之

又曰已孤暴貴不為父作謚

續文獻通考

杜佑通典云趙商問鄭志曰已孤暴貴不為父作謚而武王即位追王太王王季文王改謚爵何也答曰周道之業興於三王之功德由之王迹初焉凡為人父豈能盡賢乎若夏禹殷湯則不追謚矣

又曰既葬言謚曰類王肅曰謂類象其行言於天子以求謚也

樂記曰聞其謚知其行

郊特牲曰死而謚之禮也古者生無爵死無謚

表記曰先王謚以尊名節以壹惠耻名之浮於行也

白虎通曰號法天也法日也日未出而明謚法地也法月

也月已入有餘光是以大行受大名細行受小名行生

於已名成於人

又曰天子崩諸侯至南郊謚之以為臣子莫不欲褒稱

其君掩惡揚善故於郊明不得欺天也后夫人謚臣子

共於廟議之婦人本無外事故不於郊

又曰卿大夫老歸死有謚者別尊卑彰有德也卿大夫歸無過

猶有祿位故有謚也

五經通義曰桓王時蔡侯卒謚桓有德則善謚無德則惡

謚故同也

又曰號者所以表功德號令天下也謚之言列也陳列所行善有善謚惡有惡謚也

又曰婦人以隨從為義夫貴於朝婦貴於室故得蒙夫

之謚 又曰夫人無爵故無謚 或曰夫人有謚夫人

續文獻通考卷之三百三十四 二 四百十
一國之母修閨門之內群下亦化之故設謚章其美惡
公羊傳曰塋宋共姬稱其謚賢之也卿大夫妻命婦也
無謚者以賤也妾無謚亦以卑賤無所能與猶士卑小
不得謚也

秦始皇既併天下追尊莊襄王爲太上皇制曰朕聞上古
有號無謚中古有號死而以行爲謚如此則子議父臣
議君也甚無謂朕弗取焉自今以來除謚法朕爲始皇
帝後世以數計二世三世至于萬世傳之無窮
致堂胡氏曰子議父臣議君而非其禮罪不容誅矣考
德行之實而稱天以誅之臣子亦安得而私之哉然後
世謚法雖存而公道不勝爲臣子者徃徃加美謚於君

親使受所不當得者取世訕笑則又不若不謚之爲愈
矣

五峯胡氏曰昔周公作謚法豈使子議父臣議君哉合
天下之公奉君父以天道耳孝愛不亦深乎所以訓後
世爲君父者以立身之本也知本則身立家齊國治天
下平不知本則縱慾恣暴惡聞其過入於滅亡天下知
之而不自知也不合天下之公則爲子議父臣議君矣
臣子於君父有不善所當陳善閉邪引之當道若生不
能正既亡而又黨之是不以天道奉君父而以人道事
君父也謂之忠孝可乎今夫以筆寫神者必欲其肖不
肖吾父則非吾父不肖吾君則非吾君柰何以謚而不

肖之乎是故不正之謚忠臣孝子所不忍爲也

漢獻帝初平元年省孝和以下廟號初孝和廟號穆宗孝安號高宗孝順號敬宗孝桓號威宗至是蔡邕以爲宜省去從之

魏劉輔等論古者存有號則沒有謚必考行迹論功業而爲之制漢不修古制大臣有寵乃賜之謚今國家因用未革臣以爲今諸侯薨于位者可有謚宜定品秩之限尚書衛覬奏舊制諸王及列侯薨無少長皆賜謚古之有謚隨行美惡非以優之又以明識昭穆使不亂也臣以爲諸侯王及王子諸公侯薨可就行跡賜謚其列侯如有功勞可一切賜謚至于襲封者則不賜謚尚書趙

咨奏諸襲爵無殊才異勲于國及未冠成人皆不宜賜謚黃門侍郎荀攸議以爲古之謚記功懲惡也故有桓文靈厲之謚今侯始封其以功美受爵士者雖無官位宜皆賜謚以記其功其以功受爵而身在本位類皆比列侯自關內侯以下及名號賜爵附庸皆非謚所及若列侯襲有官位比大夫以上其不蒞官理事則當宿衛忠勤或身死王事皆宜加謚其餘襲爵既無功勞官小善微皆不足錄八座議以爲太尉荀覬所定五等列侯以上嘗爲郡國太守內史郡尉衙門將騎督以上薨者皆宜賜謚從之

晉武帝太康六年劉毅卒時承漢魏舊制爵非列侯雖有

高行而不加謚羽林左監北海王宮上疏言教忠先匪躬宜蒙謚號帝出其表使八座議之多同官議奏寢不報

東晉元帝大興三年詔古者皆謚名實相稱頃來有爵乃謚非聖賢本意通議之

彭城國為李太妃求謚太常王彪之議曰服虔註聲子之謚非禮也婦人無謚太始以來藩國王妃無有謚者中興敬后登祚乃追謚耳瑯琊武王諸葛妃恭王夏侯妃元帝猶抑蒸蒸之至情不追謚彭城太妃豈宜追謚哉

唐制太常博士掌凡王公以下擬謚皆跡其功德而為之

褒貶無爵稱子養德丘園聲實名著則謚曰先生大行則大名小行則小名告贈謚於柩 註云諸謚職事官三品以上散官佐吏錄行狀申考功勘校下太常擬謚號申省議定奏聞

玄宗天寶八載加聖祖及諸帝后號謚十三載復加

吏部尚書顏真卿上言上元中政在宮壺始增祖宗之謚玄宗末姦臣竊命有加至十一字者按周之文武言文不稱武言武不稱文豈聖德所不優乎蓋稱其至者也請自中宗以上皆從初謚睿宗曰聖貞皇帝玄宗曰孝明皇帝肅宗曰宣皇帝以省文尚質正名敦本上命百官集議儒學之士皆從真卿議獨兵部侍郎袁修官

以兵進奏言陵廟玉冊木主皆已刊勒不可輕改事遂寢

尹起莘曰增謚之事前古無有也而始於唐人其溢美無實不經之甚然當時臣子莫敢言之獨一顏真卿抗論其失而亦不能改故書詔議省祖宗謚以幸其有是議而惜其卒莫之省以譏之

范氏曰堯舜禹湯文武之君謚號惟一而已既稱天以誅之則子孫不可得而改也高宗不師古昔始改祖宗舊謚天寶以後增加複重至繁而不可紀夫祖宗苟有高世之功德則曰文曰武足矣若其無功德而子孫妄加之則是誣之而使天下後世以爲譏玩也故孝子慈

孫之欲顯其親莫若使名副其實而不浮則天下心服之矣未聞以謚號繁多爲貴也唐之典禮不經其矣

杜佑曰周制士冠禮云天子之元子士也士無謚是知

太子無謚

以未得有所施行故不得設謚

宋武夷胡氏曰古者死而不謚不以名爲諱周人以謚易名於是乎有諱禮故諸侯薨訃不以名

程子曰古之君子相其君而能致天下於大治者無他術善惡明而勸懲之道至焉耳勸得其道而天下樂爲善懲得其道而天下懼爲惡二者爲政之大權也然行之必始于朝廷而至要莫先于謚法何則刑罰雖嚴可警于一時爵賞雖重不及于後世惟美惡之謚一定則

榮辱之名不朽矣故歷代聖君賢相莫不持此以勵世風也

羅泌路史曰古之法行于今者惟謚然二千餘年而靡有定法大戴氏曰昔周公旦太公望相嗣王以制謚法周書之說亦然故今周書有謚法一篇頗爲簡要至杜預取而納之釋例而世遂重出之謂春秋謚法蓋不知也異時有廣謚者沈約賀琛皆嘗本之約又撰著謚例事頗詳備而琛之書特少去取且復強爲君臣婦女之別亦無取焉太宗皇帝爰命扈蒙裁著新書然而亦莫究明蘇洵于是究定古今斷以書傳刪其重復以爲法雖其或從或違時亦有合聖人之意然其必欲合以堯

舜三王五帝之時則大謬矣夫謚者原其號者也其不出于周公之前予嘗論之彼號近古而好牽合者無過漢儒而漢儒亦謂堯舜禹湯不入謚法則其說可槩見矣且在周書初無堯舜禹湯桀紂之文至預而後增之以湯益無所據商之太宗中宗高宗本非謚法特以其一時功烈推而崇之耳乃若甲丙庚壬乙巳丁癸何由而爲謚哉若古論謚爲法最簡故賈山曰古聖作謚不過三四十言而蔡邕之書纔四十六然猶不及世本大戴之所載者洵乃以二書邕不之見見則無不載矣周書之篇乃周公之法而春秋之謚出于此今洵反謂周公者爲最繁襍而春秋者爲簡而不亂又謂周書謚法

以鄙野不傳則知二書洵亦未嘗見也按洵書曰匹夫之有謚始東漢之隱者婦人之有謚始景王之穆后夫婦人之典周三后其著者也而穆王之盛姬亦有哀淑人之謚見于穆天子之傳匹夫之典夷齊其著者也而齊之黔婁已謚曰康見于高士傳二者其來久矣此楊侃爲職林書謂公主之有謚自唐之唐安始乃不知世祖之平陽昭文公主與齊高帝之女義興憲公主始也邕之言漢毋無謚至明帝始建光烈之稱于是請正和熹之號而不知元帝之母許恭忠高帝之母媪已有昭靈之號又何耶婦人無外行者也生也姓配其國沒也謚從其夫明有屬也秦嬴鄧曼陳媯韓姑以姓配國者

也秦穆姬宋共姬魯文嬴與夫共莊宣之三姜以謚從夫者也惟死先夫則異其謚景之穆后桓之文姜莊之哀姜之類是也後死而殊謚抑何典耶久不知攷而更請正和熹光烈之稱豈先王之典哉嗟夫顏閔至德不聞有謚而朱暉子穆輒加父以貞宣及穆之死邕復以文忠被之穆則廢典邕亦不知禮耶其貽譏于荀爽而見誚于張璠也宜矣抑嘗言之謚者正先王之所謂名教也然古之謚爲名教而後世之謚爲辱典東漢莎車以蠻夷而膺茂典此何爲耶然則邕之違禮豈惟邕之罪哉德又下衰其流及于藝術與緇黃矣名教之失孰甚于是顧不謂辱典耶

元世祖至元二十二年制謚法

武宗至大二年詔內外百官三品以上者許請謚凡請謚者許其家具本官平日勲勞政績德業藝能經由所在官司保勘與本家所供相同轉申吏部考覆呈都省都省擬準令太常禮儀院驗事蹟定謚若勲戚大臣奉旨賜謚者不在此例

順帝至元元年命嚴謚法以絕冒濫

皇明

國朝謚法凡 皇帝十七字 皇后十三字 皇妃 東

宮東宮妃二字 親王用一字郡王用二字其文武大

臣亦用二字與否取自 上裁若官品未高而侍從有

勞或死勤事 特恩賜謚者不拘常例夷王得特 賜

謚洪武初議謚俱禮部奉 旨施行

憲宗成化中駙馬都尉周景為其父鴻臚卿顯乞贈謚并

乞母祭 憲宗不允遣官 諭祭其母

孝宗弘治四年戶部尚書劉昭子綺奏乞贈謚禮部覆奏

劉昭前被劾削太子少保致仕何可復與贈謚此後有

乞恩贈謚者禮部斟酌可否務合公論不許一槩比例

濫請仍令禮科記之 十五年唐王彌 帝 奏 朝廷於

親王生封以爵歿加以謚親親之意既深且厚但其

為惡未敗者擬例上請多獲美謚是使善者怠惡者肆

也今後 王府請謚宜勘覆實跡庶彰旌善彈惡之公

禮部覆奏今後親王薨逝請行撫按覆勘郡王病故則行本府親王及承奉長史等官覆實善惡賢否據實跡陳奏然後賜謚使名與實副從之時吏部尚書馬文升奏二品以上大臣卒其子孫乞謚有賜有不賜者有謚及三品者美者多惡者少與者多不與者少乞斷自今凡二品以上大臣及始立功所封公侯伯卒無間見任致仕應與謚者或三品有特賜者宜令吏兵二部備查勲業行實仍下禮科給事中詳議等第上請賜謚若所議未公許言官舉劾禮部覆議乞仍遵舊例凡文武大臣謚俱本部具奏既得旨移文吏兵二部詳述勲業行實等第送翰林院定擬上請得

旨行吏兵二部備查實跡本部定爲上中下三等以行業俱優者爲上行實頗可者爲中行實無取者爲下開送翰林院擬謚請旨

武宗正德七年吏部尚書楊一清等議覆給事中楊禕本自今在京三品以上官考滿復職已給誥命者本部查其履歷詢其行實果堪廕錄移咨禮部奏請其曾被劾或雖未被劾而素譽有虧及雜流出身者俱不聽與至於身後卹恩子孫陳乞者贈官由本部查議而其謚號葬祭禮部亦須先會本部議其人品資望方與具奏若庸碌無補及屢被論劾者俱已之間有人品才望素著雖嘗被劾或因一事之失或出一人之見不致虧損

名節者該部各具實奏請定奪見任官不許輒自陳乞其被劾實去職及故久大臣子孫違例妄奏者罪之議上既得 俞旨禮部尚書傅珪等奏駁之曰廕子入監葬祭謚號乃本部職掌今欲預定恩廕於考滿到部之時先議謚號葬祭於禮部具奏之始與職掌會典并見行事例不合又廕子不許自陳乞與例亦不相同即如其說既經考滿復職又已請給 誥命則其人之賢可知矣旋又察其歷履詢其行實不免有高下其手之嫌葬祭謚俱有定法行之已久今必先行吏部會議方與查例不免有往來移文之擾况每遇前項事務必待該司查報至日然後具奏吏部又未嘗不與知也其陳乞

之舉固為可厭必欲一槩禁之似又難行蓋春官侍從者多論功於既沒之後不得不陳奉使海外者多非三品之官不得不陳至於補廕之子繼嗣之子及三品以上應得 恩典而沒未久者不得不陳但當罪其違例陳乞者其餘事宜仍舊歸之禮部其稱間有才望人品素著或因一事之失或出一人之見而被劾者該部各其實奏請此雖舊制所無而處置得宜則其可行也乃從珪所議既而一清又以諸司職掌廕叙列司封部下為言得仍前 旨適侍郎王瓊乞子入監吏部為覆請珪復爭曰言官建白吏部覆議皆謂大臣不得自陳乞瓊乃大臣自乞者而吏部又為之請殊戾前奏且禮部

掌行廢叙已數十餘年莫有非之者何至今日改之且職掌此條特言廢官非為廢子入監言也豈有國子監既屬禮部而其事有不屬者乎時竟令吏部掌行之蓋一清方乘用珪卒為所軋然其是非固自有在也

王世貞弇山別集序曰余嘗有謚法通紀三十卷列其凡而序之所以標先王制謚之本旨與歷代沿革輕重之變畧備矣至明亦有紀而未甚詳于是徧考金匱國史之藏秘閣之籍叅以家乘而後靡所不備凡有釋義者皆閣籍也每故事大臣卒禮部以謚請報俞矣則內閣以兩字者三請于上而自擇之是以具釋義也洪武之尚為吳也諸功臣死事及有勞而天者皆榮

公侯之爵而傳之謚終高帝世文臣弗得也武臣即都督弗贈侯伯弗得也至建文而待制王禕得謚文節矣文臣之有謚自禕始也其謚小臣者亦自禕始永樂制嚴矣終太宗世文臣之得者僅姚恭靖廣孝胡文穆廣而恭靖之爵則公也文臣之有謚僅文穆一也洪熙初始大合故臣凡勞于國誼于青宮三品而上易名者十餘人而後文臣之謚廣然宣英之代猶斤斤焉持其柄而弗輕予且夫魯王愛子也秦王次嫡子也高帝命之曰荒曰愍而登之冊曰不敢以子故而廢天下公其于宗室諸王子尚有斬也文臣之有榮愍也則瑕弗掩也文榮之以爵也文愍之以事也庶幾

寓貶矣婦人之有謚也自 后妃而外則死節也 公主之有謚也自 仁宗之悼愛女始也乳媪之有謚也自 宣宗始也乳媪之夫之有謚也亦自 宣宗始也方士之有謚也自 世宗始謚而四字甚矣而使方士得之則益甚也 世宗之季吾又得二事焉夏文愍之持秉則同列皆中謚及身以罪死易世而後牽復所得者中下謚也繼而嚴氏之持秉則其子為市焉非 上所甚注懷者必賄而後得不賄不得也即得之不腆不上謚之也及身以罪竄削弗謚也夫謚者 人主之春秋也尊則稱天以命之不尊則與天下共隲之而柰何為大臣修怨賈利地也然則如之何其必畧採唐宋故事

事遇大臣以謚請有 俞旨則翰林之司篆者為議而定二謚焉以授禮科科詳之復議而上之閣臣復奏而取 上裁凡文臣二品而上及勲親王公必謚侯伯之蒞軍府加保傅必謚謚兼美惡二品以下自卿佐以迨庶僚有德行政術亦謚謚則言官請之禮部裁之有美無惡可也自 國初以至先臣勲臣若傅友德若徐輝祖之類文臣若章溢若唐鐸若胡儼若魏源之類武臣若劉玉馬永王劾之類諫臣若楊瑄黃鞏王恩楊爵之類儒林若吳與弼陳獻章胡居仁之類文苑若李夢陽何景明楊慎李攀龍之類追之以謚可也勲臣若李善長馬勝廖永忠耿炳文丘福之類文臣若陳循若徐有

貞之類追之以謚謚而不盡蔽瑕可也又若于謙者易之以上謚可也萬安劉吉汪鉉張瓚者易之以下謚可也凡此數者皆所謂與天下共隲之操法于賞罰之外而毋使人得而議其後者也

按古謚法文之釋義蓋不徒以詞章述作稱故國初恩典有非翰林而謚文者若劉文成基馬文簡京姚文敏夔唐文襄龍葉文莊盛魏文靖驥儲文懿瓘鄭文安賜儀文簡智楊文恪廉邵文莊寶李文通奎何文肅喬新何文簡孟春黃文毅孔昭蕭文昭維楨吳文恪訥王文成守仁是也有官翰林而謚不以文者如王毅愍文陳莊靖文表榮襄宗臯劉忠愍球楊莊敏鼎盛榮簡端

明朱恭靖希周是也成弘以後則翰林專謚文而他曹不與矣

弇山集又曰國家謚法非三品以上兩京大臣不得與然而亦有得之者如楊恭惠信民以僉都御史劉文恭鉉以少詹事宋文恪訥李文忠時勉陳文定敬宗鄒文莊守益以祭酒李文通奎劉文介儼以太常少卿俱四品朱文肅善胡文穆廣呂文懿原以翰林學士張文僖益以侍讀學士楊忠愍繼盛以兵部員外郎朱忠定復張恭僖景明以長史俱五品徐文肅善述以春坊中允王文靖汝玉以贊善王文忠禕以翰林侍制劉忠愍球以侍講羅文毅倫舒文節芬俱以修撰羅文恭洪先以

贊善蔣恭靖用文以院判俱六品鍾恭愍同以御史七品陳恭愍選以布政毛忠襄吉周節愍憲馮恪愍傑許忠節達以憲副岳文肅正以知府鄧恭毅顒以知縣雖品秩不同要皆無愧大典者獨蔣以小伎獲之殊爲幸耳

按楊豫孫所著謚纂有日南知州何忠節忠上蔡知縣霍愍節恩弁州集以爲非謚似亦無據又謂院使袁宏謚襄敏考之正史有祭葬而無謚鄭汝璧所編袁襄敏寶亦由院使得謚恐名字之誤耳

張志淳論謚法曰 高皇帝跡行定謚至謂不容私諸子而謚以荒 文皇帝表章性理以謚法係諸治道且歷載朱儒之論以今考之古之用謚美惡並也近專美而無惡豈人皆善而惡謚無所于加抑亦惡不復謚而謚者得以掠美也

丘文莊公謚議曰臣謹按先正有言國家所以馭臣下者不過禍福榮辱而已爲善者生享其福死受其榮不善者生遇其禍死蒙其辱天下雖欲不治安不可得也如有不令之臣生則盜其祿位死則盜其榮名善者不知所勸惡者不知所懼臧否顛倒不可復振其爲害可勝道哉臣惟生者之禍福出於一時之蒙蔽衆論之不公人衆者勝天固可僥倖而苟免然而事久則論定天定則勝人至於蓋棺事則定矣然猶以偏愛之心持不

公之論以愚而爲賢當辱而反榮是終無天道矣是以三代明王立爲謚法以爲死後榮辱之典善者予之以美謚惡者予之以惡謚孟子所謂孝子慈孫百世不改而世之昏君僻臣乃以一己之私而掩天下之公非惟得罪於世教而實得罪於天帝也三代以前君之謚則請命乎天臣之謚則請命於君天不言而人代之言人代天言而反天之道天必殛之君不自任而俾臣代之臣承君命而負君之托逆天之理違國之法雖一時寔於人刑其如天道何唐宋議謚掌于太常博士凡於法應得謚者考其行狀撰定謚文移文吏部考功郎中覆定之本朝雖設太常博士而不掌謚議洪武初惟武

臣有謚至永樂中文臣始有謚蓋自姚廣孝胡廣始也自後文臣亦多有之然我朝之謚皆出恩賜臣竊謂九重之上於臣下之賢否未易盡知請自今以後有應得謚者未賜之先下有司考訂以聞然後從中賜下如此則得之者以爲榮不當得者不因其親故之囑託其當得者不爲朋黨之掩蔽國家激勸臣子之大端有在於是其爲世教之助夫豈細哉今上萬曆元年題准大臣應得謚者禮部仍廣加咨詢稽覈名實間有應謚而未經題請及會題請而未蒙賜謚者不論遠近許各該撫按及科道官從公舉奏禮部酌議題覆補給若不係公舉子孫自陳乞補謚者不行

十二年題准凡遇文武大臣應得謚號者備查本官生平履歷必其節槩為朝野具瞻勲猷係國家休戚公論允服毫無瑕疵者具請上裁如行業平常即官品雖崇不得槩與二十六年九月禮科羅棟奏為循職掌採公平摘舉缺謚名臣原任兵部尚書伍文定值宸濠發難倡義先登戰不逾時而擒元惡兵部尚書毛伯温當交趾作孽深入險阻兵不血刃而降酋長吏部左侍郎張元楨受知孝廟不合宰臣想其丰采比之祥麟瑞鳳刑部侍郎吳悌抗節西臺屏居二紀評其氣象擬於嶽峙淵澄都御史魯穆希心玄曠羔羊之節久而不渝兵部尚書郭宗臯敦尚風節薑桂之性老而愈

烈僉都御史宗天植忠孝尤確守四知之家法大理寺卿夏時正學成恬澹乃超慕孤山之高踪刑部尚書李廷歷宦途四十年而家無長物禮部侍郎田一儁在詞林二十載而人無間言大理寺卿陳恪之清修絕俗尚寶司卿孟秋之高潔邁群中允郭希賢以忠諫殺身庶吉士鄒智以直言貶職御史劉台之執持風紀中允張元忭之不愧科名以上諸臣合于例而應得謚者或循例議補格于例而不得謚者或破格議與可也上曰謚法乃國家激勸大典以彰前賢以勵後進以定萬世之公論這所奏着禮部從公看實議謚具奏以憑裁奪亦有謚之美惡未當其人查來俱改正行十月禮部



覆按臣喬璧星本議謚 上曰卿等虚心詳議應謚的
 准與補謚若已謚的采與衆議不協方許改正追奪毋
 得苛求以傷 朝廷錫予之典其議謚類奏係你部裡
 職掌以後還照舊行 二十八年七月山西道御史李
 時華奏原任禮部右侍郎陞南京工部尚書孫應鰲掘
 起黔南爲時山斗究學術則講明于關中發揮于大學
 論事功則戡亂于西蜀詰戎于鄖陽誠王守仁趙貞吉
 之流亞也應備會議以錫謚典 八月大學士沈一貫
 揭奏 佑聖夫人徐氏謚號勤敬榮安四字乞 欽定
 上曰朕恤佑聖夫人奉侍三朝恭勤茂著着照謚號
 四字俱賜與他以示眷酬此係 特恩後不爲例 諭

卿等知

歷代謚法釋義

周公謚法 周公旦太公望開嗣王業建功于牧野

終將葬乃制謚遂叙謚法

民無能名曰神 善不可名

靖民則法曰皇 靖安也

德象天地曰帝 同于天地

仁義所往曰王 民所歸往

立志及衆曰公 志無私也

執應八方曰侯 所執行八方應之

慶賞刑威曰君 能行四者

從之成群曰君 民皆從之

教誨不倦曰長

揚善賦簡曰聖 衆善播揚所賦得簡

敬賓厚禮曰聖 聖于禮也

一德不懈曰簡

平易不訾曰簡 不信訾毀一云不疵

尊賢貴義曰恭 會編有淵源通流曰恭

敬事供上曰恭 供奉也

尊賢敬上曰恭 敬有德讓有功

愛民長弟曰恭 恤民字幼

執禮御賓曰恭 御迎也

既過能改曰恭

執事堅固曰恭 守正不移

庇親之闕曰恭 修德以益之

尊賢讓善曰恭 不專己善推于人

臨照四方曰明 以明照之

譖愬不行曰明 逆知之故不行

經緯天地曰文 裁成其道

道德博聞曰文 無所不知

勤學好問曰文 敏而好學不耻下問

慈惠愛民曰文 惠以成政

愍民惠禮曰文 惠而有禮

錫民爵位曰文 與賢同升

威儀悉備曰欽

安民大慮曰定 以慮安民

大慮靜民曰定 會編無此條

純行不爽曰定 行不一傷

安民法古曰定 不失舊憲

辟地有德曰襄 取之以義

甲冑有勞曰襄 有功征代

綏柔士民曰德 士民皆安德及天下

執義揚善曰德 守已義揚善人

諫諍不威曰德 不以威拒諫

剛彊直理曰武 剛強不屈直人以理

威強敵德曰武 威強能勝以德

克定禍亂曰武 以勇往故能定

刑民克服曰武 法以正民使服

夸志多窮曰武 大志行兵多所窮極

小心畏忌曰僖 思所當忌按會編有慈惠愛親曰僖

質淵受諫曰釐 深故能受

有伐而還曰釐 知難故退按會編有慈惠愛親曰釐

溫柔賢善曰懿 德性純淑

心能制義曰度 制事得宜

聰明睿哲曰獻 事理皆通

知質有聖曰獻 有通無蔽按會編有博聞多能曰獻

安民立政曰成 安靖其民政可垂後

淵源流通曰康 往無所忌

溫良好樂曰康 性稟謙和

安樂撫民曰康 四方無虞

令民安樂曰康 富而教之

五宗安之曰孝 體親睦宗

秉德不回曰孝 守德無邪

慈惠愛親曰孝

協時肇享曰孝 因時肇享

大慮行節曰孝

執心克莊曰齊 敬存于心

資輔就共曰齊 資輔相共成功

布德執義曰穆

中情見貌曰穆 公而顯明

甄心勤懼曰頃 甄精也

敏以敬慎曰頃 敏疾不縱會編無 又曰甄心勤懼

容儀恭美曰昭 淑儀不愆

明德有勞曰昭 布明其德而有功勞

聖聞周達曰昭 令名洋溢

柔德安眾曰靖 和以安民

恭已鮮言曰靖 正容寡言

寬樂令終曰靖 寬廣和樂以善自終

威德剛武曰圉 能禦禍亂

治而無青曰平 無災患

執事有制曰平 稱物以施不任意

布綱治紀曰平 法度皆理

由義而濟曰景 以義成事

耆意大慮曰景 耆強也

布義行剛曰景 守義不屈

彌年壽考曰胡 久也

保民耆艾曰胡 能壽也

追補前過曰剛 惟剛德能補過會編有強毅果敢曰

剛

彊又執正曰威 義勇無邪又作毅

強以剛果曰威 強甚於剛會編作猛以強果曰威

清白守節曰貞 行無虧節無失

大慮克就曰貞 以天下為度而能成其功

不隱無屈曰貞 坦然無私無屈會編作無私

治典不殺曰祈 秉常不衰祈一云祁會編無

治民克盡曰使 嚴督無私

好和不爭曰安 與人無競

道德純一曰思 精粹不雜按會編有辟土燕國曰思

大省兆民曰思 心常在民

外內思索曰思 慮周於人已

追悔前過曰思 思而能改

行見中外曰慤 表裏如一

辟土服遠曰桓 以威正人

克敬勤民曰桓 敬以使民一云動民

辟土蕪國曰桓 蕪并也

能思辯衆曰元 別之使各有次

行義說民曰元 民悅其義

始建國都曰元 非善之長何以始之

主義行德曰元 以義為主而行德政

聖善周聞曰宣 周聞謂廣文也

兵甲亟作曰莊 以數征爲嚴

敵圍克服曰莊 通邊圍使能服

勝敵志強曰莊 不撓故勝

死于原野曰莊 非嚴何以死難

屢征殺伐曰莊 以嚴釐之

武而不遂曰莊 武能持重

柔質慈民曰惠 心性慈祥

愛民好與曰惠 好於施予會編有柔質受諫曰惠

夙夜警戒曰敬 心存警惕按會編有夙夜恭事曰敬

與象方益平曰敬

善合法典曰敬 不敢違法 史記作合善典法

狀古述今日譽 立言之稱

昭功寧民曰商 有安民之功

克殺秉政曰夷 傷民不任賢

安心好靜曰夷 不妄動

慈仁短折曰懷 短未六十折未二十

述義不克曰丁 不能成義按會編有述義不弟曰丁

有功安民曰烈 以武立功

秉德遵業曰烈 會編無

剛克爲伐曰烈 伐功也

思慮深遠曰翼 小心

剛德克就曰肅 成其敬使令終

執心决斷曰肅 嚴果

外內貞復曰白 外內皆正終而復始

不生其國曰聲 生于外家

未家短折曰殤 未娶

短折不成曰殤 有知而夭

愛民好治曰戴

典禮不愆曰戴

不勤成名曰靈 任本性不見賢思齊

死而志成曰靈 能成其志

死見神能曰靈 鬼不爲厲

亂而不損曰靈 不能以治損亂

好祭鬼恠曰靈 黷于淫祀會編無

極知鬼事曰靈 知通幽微

違拂不成曰隱 有才不得盡施

不顯尸國曰隱 以闇主國

見羨堅長曰隱 不言而羨自著堅且久也

官人應實曰知 以實求賢

殺戮無辜曰厲

悞狠遂過曰刺 不受人言不改已非

不思忘愛曰刺 忘其愛已者

肆行勞祀曰悼 淫祀勞民

恐懼徙處曰悼 處艱難之時常懷恐懼

年中早夭曰悼 年不稱志

早孤短折曰哀

恭仁短折曰哀

好變動民曰躁 不能安靜

不悔前過曰戾 乖戾反常

怙威肆行曰醜

壅遏不通曰幽 暗也

早孤隕位曰幽 即位而卒

動察亂常曰幽 易神之班不明也一云動靜

外內縱亂曰荒 家不正國不理

好樂怠政曰荒

凶年無谷曰荒 不務耕稼

在國遭憂曰愍 國多大喪

在國遭艱曰愍 兵寇之事一云逢難

禍亂方作曰愍

使民悲傷曰愍 遭遇可傷

質柔受諫曰慧 以虛受人一云柔質

貞心大度曰匡 心正量弘

名實不爽曰質

德正應和曰莫 正其德應其和

溫良好樂曰良 其人可好可樂

勤政無私曰類 無私惟義所在一云施勤無私

慈和徧服曰順 能以慈和使人皆服

思慮果遠曰明 不惑于疑不蔽于近

博聞多能曰憲 有學有才

畜于賜予曰愛 貪吝

滿志多窮曰惑 滿以招損其心不明

危身奉上曰忠 險不避難

思慮不爽曰厚 不差所思其功必多

克威捷行曰魏 有威而敏行

克威惠禮曰魏 威而順理

去禮遠衆曰煬 不率禮不親民

好內遠禮曰煬 淫不守正遠禮會編作怠政

內外賓服曰正 能以衆正

肇敏行成曰直 始疾行成言無所撓沮

彰義掩過曰堅 彰人善掩人過堅固人也

䟽遠繼位曰紹 非次得之

華言無實曰夸

好廉自克曰節 不侈情欲

逆天害民曰抗

好更改舊曰易 變故改常

名與實爽曰繆

愛民任刑曰克 愛民而齊之以法一作克

擇善而從曰比 親比于善

除殘去害曰湯

史記不載會編續載

容儀恭美曰勝

勝敵壯志曰勇

既過能改曰共 凶年無穀曰糠 糠虛也

思慮深遠曰捍 怠政交外曰攜

喪國心斬曰赧

蔡邕獨斷帝謚

違拂不成曰隱 靖民則法曰黃

翼善傳聖曰堯 仁聖盛明曰舜

殘人多壘曰桀 又曰多殺 殘義損善曰紂

慈惠愛親曰孝 愛民好與曰惠

聖善周文曰宣

聲聞宣遠曰昭

剋定禍亂曰武

聰明睿智曰獻

溫柔聖善曰懿

布德執義曰穆

仁義說民曰元

安仁立政曰神

布綱治紀曰平

亂而不損曰靈

保民者艾曰明

辟土有德曰襄

貞心大度曰匡

大慮慈民曰定

知過能改曰恭

不生其國曰聲

一德不懈曰簡

夙興夜寐曰敬

清白自守曰貞

柔德好衆曰靖

安樂治民曰康

小心畏忌曰僖

中身早折曰悼

慈仁和民曰順

好勇致力曰莊

恭仁短折曰哀

在國逢難曰愍

名實過爽曰繆

雍遏不通曰幽

暴虐無親曰厲又曰殺戮無辜

致志大圖曰景

辟土兼國曰桓

經緯天地曰文

執義揚善曰懷

短折不成曰殤

去禮遠衆曰燭

怠政外交曰攜

治典不敷曰祈

北魏元修謚議

除偽寧真曰武

此釋義古不載修議引以謚于忠者

恐亦有據

隋謚

閻 此謚古不載隋文帝以謚斛斯徵宜補入下謚

張星謚議

好功自是曰專 此謚古不載唐臣星引以請謚宋慶

禮恐必有據

張瓌謚議

貪而敗官曰墨 此謚古無釋義唐張瓌引以請謚錢

惟演宜存備考

蘇洵謚法釋義

文 經天緯地 勤學好問 修德來遠 慈惠愛民

忠信接禮 愍民惠禮 道德博聞 錫民爵位

剛柔相濟 修治班制 敏而好學 施而中禮

武 克定戡亂 剛強直禮 保大定功 夸志多窮

威強敵德 剛強以順 闢土斥境 折衝禦侮

刑民克服

成 禮樂明具 安民立政 持盈守滿 遂物之美

通遠強立

康 撫民安樂 淵源流通 溫良好樂 令民安樂

獻 聰明睿智 嚮忠內德 智質自操

懿 柔克有光 溫柔聖善

元 體仁長民 行義說民 始建國都 道德純一

思能辨衆 立義行德

章 法度大明 敬慎高明 出言有文

景 耆意大圖 由義而濟 布義行剛

宣 施而不私 聖善周聞 善聞周達 誠意見外

明 照臨四海 任賢致遠 招集殊異 獨見先識

昭 明德有功 能揚側陋 察色見情

聖問達道 容儀恭美 聖聞周達 昭德有勞

正 內外賓服

恭 卑以自牧 尊賢貴義 敬順事上 不懈為德

尊賢敬讓 執事堅固 治典不易 愛民悌長

珉禮御賓 貢難于君 庇親之闕 尊賢讓美

既過能改 正德美俗

莊 嚴敬臨民 威而不猛 履正志和

憲 賞善罰惡 博聞多能 行善可紀

敏 應事有功

端 守禮執義

介 執一不遷

通 物至能應 事起而辨

靖 寬樂令終 恭已鮮言

賢 行義合道 明德有誠

孝 慈惠愛敬 能養能恭 繼志成事 協時肇享

幹蠱用譽 秉德不回 五宗安之 大慮行節

續文獻通考

卷之百三十四

二十九

二百九十六

忠 盛衰純固 危身奉上 臨患不忘國

推賢盡忠 蕪方公正

惠 愛民好與 柔質慈民 柔質受諫 勤施無私

和 柔遠能邇 號令民悅 不剛不柔 推賢讓能

安 好和不爭 兆民寧賴

質 名實不爽 忠正無邪

烈 安民有功 秉德遵業

威 賞勸刑懲 猛以剛果 以責服遠 強毅執正

勇 率義共用

義 制事合宜 見義能終 先君後已 取而不貪

除去天地之害

剛 強毅果敢 追補前過 致果殺敵 強而能斷

壯 勝敵克亂 共圍克服 死于原野 武而不遂

屢征殺伐

節 好廉自克 謹行制度

襄 闢土有德 因事有功 甲冑有勞

愍 在國逢難

勤 能修其官

溫 德性寬和

良 中心敬事 溫良好樂

密 追補前過

榮 寵祿光大

順 慈和徧服 和比于理

僖 小心畏忌

釐 質淵受諫

純 中正精粹

修 勤其世業 好學近智

恪 敬共官次 威容端嚴 温恭朝夕

敦 温仁忠厚 善行不怠 能記國善

思 追悔前過 大省兆民 謀慮不僭 外内思索

念終如始

容 寬裕温柔

肅 剛德克就 執心决斷 正已攝下

穆 布德執義 中情見貌

清 避遠不義

定 安民大慮 純行不爽 大慮慈仁 安民法古

簡 治典不殺 平易不訾 正直無邪 一德不懈

毅 致果殺敵 強而能斷

謚法下文三十五言

友 睦于兄弟

禮 奉義順則 恭儉莊敬

達 質直好善 䟽中通理

懷 慈仁短折 執義拘善 失位而死

理 才敏審諦

裕 強學好問

素 達禮蔽樂

翼 思慮深遠 愛民好治

潔 不污不義

齊 執心克莊

隱 違拂不成 不顯尸國 懷情不盡

確 執德不惑

顯 行見中外

果 好力致勇

平 治而無背 執事有制 布綱治紀

悼 肆行勞祀 未中早天 恐懼徒處

懋 以德受官 以功受賞

信 守命共時 出言可復

靈 亂而不損 不勤成名 死見神能 好祭鬼神

極 知鬼神

易 好更故舊

虛 涼德薄禮 華言無實

愿 敗亂百度 志德敗禮 柔無立志

縱 弱而立志

厲 殺戮無辜

刺 狠悞遂過 不思妄受

荒 外內縱亂 好樂怠政

續文獻通考 卷之三百三十四 三十一 二百

躁 好變動民

戾 不悔前過

醜 怙威肆行

幽 壅遏不通

早孤隕位

動察亂常

愛 嗇于賜予

煬 好內違禮

好內怠政

去禮遠正

違天害民

携 怠政外交

夸 華言無實

繆 名與實爽

鄭夾漈謚法并雜論

神聖賢文武成康獻懿元章

釐景宜明昭正敬一恭莊肅穆

戴翼襄烈桓威勇毅克壯固

魏安定簡貞節白匡質靖真

順思考高顯和玄高光大英

睿博憲堅孝忠惠德仁智慎

禮義周敏信達寬理凱清直

欽益良度類基慈齊深溫讓

密厚純勤謙友祁廣淑儉靈

榮厲比潔舒賁益退訥悃速

懋宜哲察通儀經庇協端休

悅綽容確恒熙洽紹世果

右上謚百三十一用之君親用之君子

懷悼愍亦作哀隱幽冲夷懼息

携郵辱傲

野夸躁伐荒煬戾刺虛蕩墨
憊亢干褊專輕苛介暴虐悞
悖凶慢忍毒惡殘曩攘頑昏
驕醜涵僥狃侈惑靡溺偽妄
讒諂誣詐譎訕詭姦邪慝蠱
危圯懦撓覆敗斲疵饕費

右下謚六十五用之穢夷用之小人

鄭夾漈曰天下有難行之道雖曰古有是道而後世終不可行者非古有是道也後之人設是道以實之耳豈有可行於古而不可行於今之道乎若曰臣子可以議君父之得失使有德則謚善無德則謚惡大行受大名細行受細名行生於己名生於人此真不可行之道也自非伐無道誅有罪收其鯨鯢以為京觀則安得有惡謚之稱乎臣以為立謚之意本為昭穆命謚之義取於尊隆且生有惡死無惡者人之情也生可簡死不可簡者禮之事也生雖侯伯死必稱公生不踰等死必加等先王之通制也豈有稱生之號有隆而命死之名有虧乎謚亦有惡惡謚非所以加君父也子曰父在觀其志

父沒觀其行三年無改於父之道可謂孝矣不若是是不當於人心子議父臣議君秦人之所厭而削之也今先儒之所謂謚者正秦人之論耳不合于古道

又曰謚法惡謚莫如桀紂其次莫如桓靈其次莫如幽厲此古今之所聞也以臣所見皆不然桀紂是名耳非謚也名者生之所命而非死之所加也當夏之季當殷之興則未有謚桀非謚也當殷之季當周之興雖有謚法然得謚為榮不得謚為辱名之以紂辱莫大焉桀之所名者取於木猶高柴公孫枝之所取云爾豈有殘人多殺之名而可以為名乎紂之所名者取於絲猶臧紇南宮縚之所取云爾豈有殘義損善之名而可以為名乎是名也非已之所更即父兄之所命也安得有是義乎桓於經典並無惡義如公執桓圭桓乃圭璋之首稱如桓桓武王桓乃果毅之盛德齊之桓公用能霸業周之桓王元無累行安得桓為惡名乎靈者神聖之異名周之東也王綱不振四方解體迨乎靈王周道始昌諸侯服從故傳曰惟有髭王甚神聖以其生有神聖之德死則謚之以靈是為名實允當其曰請為靈若厲者荆蠻不根之論也安得靈為惡名乎幽者隱之並名也周幽王喪於犬戎之禍魯隱公卒於羽父之難皆臣子所不忍言故以幽隱命之痛惻之甚也豈有壅遏不通之義乎語曰子温而厲威而不猛恭而安厲與安並德故

續文獻通考

於厲言而猛則異於是故於猛言不厲非惡也豈有暴
雷無親之義乎厲王過矣使厲王而有暴雷無親之名
則宣王不得爲孝子幽王過矣使幽王而受壅遏不通
之責則晉文侯鄭武公不得爲良臣成周之法初無惡
謚謚之有惡者後人之所立也田美刺之說行然後人
立惡謚

又曰法之爲謚者取一文耳非有他說也謚法行其說
紛紛矣書見于世者有周公謚法有春秋謚法有廣謚
有今文尚書有大戴記有世本有獨斷有劉熙之書有
來輿之書有沈約之書有賀琛之書有王彥威之書有
蘇冕之書有扈蒙之書有蘇洵之書其實皆由漢魏以

來儒生取古人之書而釋以已說集而爲法也故蘇洵
曰周公之法及取賀琛之新法載之書是知世之謚法
名爲古者實非古也今考周公之書所用後人之語甚
多是皆爲謚法者展轉相因言文雜採無足取也惟沈
約之書博采古今詮次有紀然亦無所建明至蘇氏承
詔編定六家謚法乃取周公春秋廣謚沈約賀琛扈蒙
之書斷然有所去取其善惡有一定之論實前人所不
及也皇也帝也王也公也侯也君也師也長也胥也實
尊卑之號上下之稱且生有爵死有謚以是爲謚未之
敢聞也若皇帝可以爲謚則天子亦可以爲謚矣若公
侯可以爲謚則卿大夫亦可以爲謚矣若師長可以爲

謚則父兄亦可以爲謚矣無義之談莫此爲甚經幾百年間而後蘇子闡之堯取壘土以命名舜取穰華以命名禹取于獸湯取于木桀以喬木紂以繹絲是非已之所更必父兄之所命也且生有爵死有謚以是爲謚未之前聞也蘇氏未暇及臣不敢後焉謹條其可用者二百十謚分爲三類只以一文見義無事乎文之廣無事乎說之繁庶乎表裏蘇氏之學是亦典禮之大者

又曰凡蘇氏所取一百六十八謚三百十一條臣今只卽一文以見義卽文可以見文不必曰施而中理曰文經緯天地曰文卽武可以見武不必曰克定禍亂曰武保大定功曰武卽孝可以見孝不必曰慈惠愛親曰孝

能養能恭曰孝卽忠可以見忠不必曰盛衰純固曰忠臨患不忘曰忠且卽文以見義則文簡而義顯舍文而從說則說多而義惑蘇氏所削爲多矣今復削去三百一十一條之說只從百六十八謚而損增焉實得二百十謚分而爲三上謚百三十一用于君親用于君子下謚六十五用于殲夷用于非君子中謚十四用于閔傷用于無後者其有堯舜禹湯桀紂六文乃人名非謚法所宜去也陳胡公滿者言其老也有胡考之稱焉胡非謚義齊有丁公名也漢有丁公姓也丁非謚義故去胡去丁曰尚曰使曰軍曰趨曰謁曰莫曰敵曰震曰攝曰革曰易曰素曰頃凡十三文雖有其謚於辭義未安故宜

去也曰原曰愛曰聲曰聞曰要曰強曰平凡七文文雖
可用于義不專亦宜去蘇氏所取者百六十八謚今去
其二十八謚蘇氏所去者百九十八謚今取其七十二
謚披沙得金甄金去土非相違也而相從也

又曰蘇氏去其歷代所以為尊卑之號者九皇帝王公
侯君師長胥是也子曰左丘明耻之丘亦耻之蘇氏去
其義之不安者八今取其賁取其逸所以待丘園也蘇
氏去其子孫不忍稱者九十四今取其暴取其害取其
悞取其凶取其悖取其慢取其忍取其惡取其毒取其
曩取其攘取其頑所以待暴戾取其昏取其驕取其醜
取其涵取其僥取其狙取其侈取其惑取其靡取其溺

所以待淫侈取其譖取其偽取其讎取其妄取其誣取
其詐取其譎取其訕取其詭取其奸取其邪取其隱取
其蠱所以待奸回取其危取其圯取其撓取其覆取其
敗取其斃所以待其亡取其懦取其疵取其饕所以待
貪鄙蘇氏去其名之不能舉其人之要者八今取其退
取其訥所以待恬退之士取其修取其訓所以待禮法
之人蘇氏去其鄙陋不足以訓者十有一今取其僇取
其速為靖專者備也蘇氏去其泛濫不可指名善惡之
狀者七今取其慙為黽勉者備也取其宜為中庸者備
也蘇氏去其重複而無益於用者五十七今取其哲有
異于智也取其察有異于明也取其通有異于敏也取

其儀有異于穆也取其經有異于憲也取其協有異于順也取其端有異于直也取其費有異于諉也取其休取其悅有異于凱也取其綽取其容有異于寬也取其確取其恒有異于介也取其熙取其洽有異于和也又曰蘇氏于百六十八謚之外有七去三百十一條之中有六類七去者削其文六類者易其義臣今此書只用文顯不可義說故于六類亦無所用但第四類中比儉二義于文未安不得不爲之說儉乃恭儉之儉比乃協比之比儉也比也古之美謚也蘇氏引儉則固之義而更之曰菲薄廢禮曰儉引君子周而不比之義而更之曰事君有黨曰比以比儉二謚內于惡德此臣之所不取也儉若爲惡德則夫子溫良恭儉之儉其將何取比若爲惡德則協比其隣婚姻孔云之比其將何爲若之何以不中禮之儉爲儉朋比之比爲比乎臣今易置從古道也

又曰語曰孔文子何以謂之文也子曰敏而好學不耻下問是以謂之文也然則文子之謚初無謚法仲尼策因問而即其人之行事以釋之柰何先立其法必使人之曲中也規矩本爲方員設而非豫爲小大劑量使制器者範圍于此况所作之法只採經傳之言其間有大不通理處子曰敏而好學不耻下問是以謂之文而曰敏而好學曰文可也孟子曰陳善閉邪謂之敬而云陳

善閉邪曰敬可也易之益曰君子見善則遷有過則改而云遷善改過曰易可也左傳曰共用之謂勇而云率義共用曰勇可也柰何詩曰猗矣能言巧言如流而云巧言如流曰猗可乎書曰賓于四門四門穆穆而云闢于四門曰穆可乎傳曰季子生而有文在其手曰友遂命之而云有文在手曰友何義也書曰乃聖乃神乃武乃文而云乃聖乃神曰武何義也詩序曰太平之君子能持盈守成而云持盈守滿曰成何義也至于終始如一者則謂之終爲人所渴望者則謂之渴于義安乎取並后匹嫡之義而爲並取牝雞之晨惟家之索而爲索是可用乎千百載間學者見之博士禮官行之而斷無以爲非者何哉

愚謂周公創謚之意正欲美惡不相掩使天下後世之爲君臣者知善則生有顯名沒又有榮稱不然雖忠臣孝子亦不得而私之庶幾以是不傲然肆志乎豈第取於昭穆與尊隆爲也夫昭穆何假於謚謚而又厯取於尊隆如幽如厲俱爲美謚則雖秦王亦欣然承之無用除去矣夾漈分別三等似亦未合古義

皇明通用謚法釋義

文	經緯天地	修德來遠	勤學好問	道德博聞
	慈惠愛民	敏而好學	愍民惠禮	剛柔相濟
	忠信接禮	修治班制	施而中禮	

續文獻通考 卷之三百三十四 四十一 三百四十一

柳道博議姚燧謚云博聞多見曰文敬直慈惠曰文

武 克定禍亂 保大定功 威強敵德 剛強直理

剛強以順 闢土斥境 折衝禦侮 刑民克服

成 禮樂明具 持盈守滿 遂物之美 通遠強立

安民立政

康 安樂撫民 溫柔好樂 令民安樂 淵源流通

獻 聰明睿智 嚮惠內德 智質有理

懿 柔克有光 溫柔賢善

元 體仁長民 行義說民 道德純一 立建國都

思能辨衆 立義行德

章 法度大明 敬慎高明 出言有文

景 耆意大圖 由義而濟 布義行剛

宣 施而不私 善聞周達 誠意見外 聖善周聞

明 照臨四方 任賢致遠 獨見先識 諧愬不行

察色見情 招集殊異

昭 明德有功 聖聞昭達 容儀恭美 昭德有勞

正 內外賓服

恭 卑以自牧 尊賢貴義 不懈為德 敬事供上

愛民弟長 執禮御賓 尊賢讓善 執事堅固

敬順事上 正德美容 既過能改

莊 嚴敬臨民 威而不猛 履正志和

肅 剛德克就 執心決斷 正已攝下

續文獻通考 卷之三百三十四

穆 布德執義 中情見貌

清 避遠不義

定 安民大慮 安民法古 純行不爽

簡 治典不殺 平易不訾 正直無邪 一德不懈

憲 賞善罰奸 博聞多能 行善可紀

敏 應事有功 元劉致議蕭軒謚云好古不怠曰敏

端 守禮執義

敬 夙夜儆戒 夙興恭事 合善典法

介 執一不遷

裕 強學好問

通 物至能應 事起而辨

白 外內貞復

靖 寬樂令終 恭已鮮言 柔德安衆

元虞集議陳文靖謚曰仕不躁進曰靖

賢 行義合道 明德有成

貞 清白守節 大慮克就 不隱無屈

孝 慈惠愛親 五宗安之 大慮行節 能養能恭

繼志成事 協時肇享 秉德不回 幹蠱用譽

忠 盛衰純固 危身奉上 推能盡忠 廣方公正

臨患不忘國

惠 愛民好與 柔質慈民 施勤無私

和 柔克有光 不剛不柔 號令民悅 推賢讓能

續文獻通考 卷之三百三十四 四十三 二百七十六

安 和好不爭 兆民寧頽

質 名實不爽 忠正無邪

靜 柔德教衆

烈 安民有功 秉德尊業

禮 奉義順則 恭儉莊敬

威 賞勸刑懲 以刑服遠 猛以疆果 強義執正

勇 率意共用 又云臨難不懼

義 制事合宜 見義能忠 先君後已 取而不貪

除去天地之害

剛 強義果敢 追補前過 致果殺敵 強而能斷

壯 勝敵志強 獻圍見服 死於原野 兵甲亟作

履征殺伐 武而不遂

慤 表裏如一

潔 不污不義

節 好廉自克 謹行制度

襄 闢地有德 甲冑有勞 因事有功

愍 在國逢難

良 小心敬事 溫良好樂

勤 能修其官

密 追補前過

溫 德性寬和

榮 寵祿光大

續文獻通考 卷之三百三十四

續文獻通考 卷之三百二十四 四十四 一百五十五

順 慈和徧服 和比於理 慈仁和民

僖 小心畏忌 無過為僖 質淵受諫 小心恭慎

純 中正和粹

果 好力致勇 好學近智

修 勤其世業

顯 行見中外

恪 敬共官次 威容端嚴 溫恭朝夕

毅 善行不怠 溫仁忠厚 能紀國善

思 追悔前過 念終如始 謀慮不僭 外內思索

容 寬裕溫柔

懷 慈仁短折 失位而死

隱 懷情不盡 違拂不成

桓 辟土服遠 克敬動民 辟土兼國

慧 質柔受諫

已上六十八字見于類鈔者似亦未詳姑依原稿錄之備覽有文無義者并載于後

寧 國初謚中山王謚法未載或 太祖取不殺之義

慎 成化中謚夫人韓氏曰恭慎

冲 嘉靖中謚 皇太子曰哀冲或取冲年之義

淑 嘉靖中謚康妃杜氏曰榮淑

善 弘治中謚夫人項氏曰榮善

崇 洪武初謚合浦侯陳清曰崇武弘治中謚夫人胡

續文獻通考 卷之三百二十四

四十四

氏曰崇善夫人姚氏曰崇敬弇州稿以為能修其官曰
崇不知何所考據

續文獻通考卷之一百三十五

皇明進士雲間王圻纂輯

謚法考 古帝王謚至周同姓列國謚上

古帝王謚

黃帝有熊氏姬姓名軒轅又云居軒轅之丘故號軒轅氏
或曰謚黃

杜佑云黃者中和美色帝承天德最盛淳美故以尊色
為謚又按白虎通云先黃後帝者古者尚質生死同稱
將各行合而言之美者在上黃帝始制法度得道之中
萬代不易後代德與天同亦得稱帝不能制作故不得
復稱黃也

顓頊高陽氏姬姓皇帝孫昌意子代少昊為帝或云諡顓頊

杜佑曰按五經通義云顓猶專頊猶愉幼小而王以致太平常自愉愉謙約自小之意故兩字為諡

帝堯陶唐氏伊祁姓名放勳或曰諡堯

帝舜有虞氏姚姓名重華或曰諡舜

杜佑曰帝堯帝舜先號後諡也帝者德盛與天同號諡雖美終不過天也故如其次道之

夏王禹姒姓名文命或曰諡禹

裴駟曰按諡法受禪成功曰禹又曰淵源流通

羅泌曰夷益棄契皆名也而夷棄獨以官稱虞伯后

司徒皆官也而契伯益何獨以名著耶古之人要不為是拘也予述路史既推堯舜禹為名矣而或以為諡殊不知諡不出于古書傳雖云諡出黃帝然實出于周公何以言之予觀夏商帝王皆非諡法知之也死諡周道也古者生無爵死無諡故始皇之制曰朕聞上古有號無諡中古有號死而以行為諡是以秦秀謂昔周公弔二季之陵遲哀大道之不行于是作諡以紀其終而穀梁亦曰武王崩周公制諡法世有諡法輒悉文致堯舜禹湯桀紂之類而彝入之蓋始于白虎群儒斯最荒唐者也夫堯舜禹之為名本自彰也堯曰咨汝舜舜曰咨汝禹汝棄汝契是皆名也若以為諡則契稷垂益夔龍

一皆為謚而後可有繆在下曰虞舜豈繆而在下已有謚乎

桀名履癸或云謚桀

裴駟曰按謚法賊人多殺曰桀索隱曰桀名也

商成湯姓子名履又名天乙或曰謚成湯

杜佑曰質家兩言為謚成湯是也文家一言為謚文武是也號無質文謚有質文 註云號者始也質以為本

故不可變周公以後尤文以為本生習善事死有善謚故合言文王武王又馬融曰雲行雨施曰湯

祖甲亦曰太甲或云謚

杜佑曰以名配者德薄因名配謚祖甲是也質家不連

號謚文家連號 註云生則為號死則言謚故不連號

成湯是也欲但言謚不忍死之欲但言號又是實死故以號謚文王武王是也

紂名辛一名受或曰謚紂

杜佑曰桀紂先號後謚者別誅絕也

皇明鄭曉曰謚法言起於周公恐前此已有之但至周公叙謚法增廣之耳堯曰神宗堯之先又有文祖藝祖

湯曰成湯又曰武湯曰烈祖曰高后曰高祖曰神后曰武王守成之主太戊曰中宗武丁曰高宗由是觀之謚

與廟號周公前固有之

商臣謚

伯夷孤竹君之長子姓墨氏一云墨台氏索隱曰名元字

公信諡夷作允元至順二年追封昭義清惠公

叔齊孤竹君之次子索隱曰名致字公達諡齊致一作智元

至順二年追封崇讓仁惠公

周王及后諡

王昌姬姓裔出帝嚳在商為西伯武王即位追諡為文

王發文王子諡武王誦武王子諡成

王釗成王子諡康王瑕康王子諡昭

杜佑曰文王武王先諡後號註云王者德薄傳位與

子賢不肖同稱王號者所共諡者所專故上諡下號上

其美者

王滿昭王子諡穆王繫扈穆王子諡共

王難共王子諡懿王辟方共王弟諡孝

王燮孝王子諡夷王胡夷王子諡厲

王靖厲王子諡宣王涅宣王子諡幽

王宓白幽王子諡平王林平王子諡桓

王佗桓王子諡莊王胡齊莊王子諡釐

王閻釐王子諡惠王鄭惠王子諡襄

王壬臣襄王子諡頃王班頃王子諡匡

王瑜匡王弟諡定王夷定王子諡簡

王泄心簡王子諡靈

王生而有髭且神故諡為靈民祀其冢不絕

王貴靈王子諡景

王猛景王子諡悼

王句景王子諡敬

王仁敬王子諡元 一名赤

王介元王子諡貞定

王去疾貞定王子諡哀

王叔襲哀王弟弒兄自立諡思

王嵬貞定王子弒思王自立諡考

王午考王子諡威烈

王驕威烈王子諡安

王喜安王子諡烈

王扁安王次子諡顯

王定顯王子諡慎靚

王延慎靚王子諡赧

都西周時
東西分治

考赧二諡周諡法無皇甫諡云以微弱慚媿故號赧

幽王次子伯服諡攜

按羅泌路史謂天子之元子士也士無諡故太子無諡

然幽王次子則諡攜矣他如東周之共太子陳之悼太

子之類又不止一人則泌所謂太子無諡殆未之考耳

周時王后皆從王諡詩云亦右文母可見然景王后獨

諡穆

周親王諡

河南公名揭貞定王子考王所封諡桓公

桓公子諡威公 失名

威公子桀諡惠公 是時與赧王東西分治

惠公長子西周公諡武公 失名戰國策作東周武公

武公長子諡共太子 失名索隱又云武公太子文公

惠公少子東周公名鞏諡惠公 父子同諡恐訛

周卿士諡

王子虎諡文為王叔文公 虎名叔族

虎之子諡桓為王叔桓公 失名

周公黑肩諡桓為周桓公 即周公旦之次子留相王室

代為周公國在畿內公爵

召虎康公九世孫宣王時平淮南之夷諡穆公 即召公

奭之次子留相王室代為召公國在畿內伯爵至虎有

諡

劉夏諡定為劉定公 劉采地

定公子劉整諡獻為劉獻公

獻公子劉伯蚩諡文為劉文公

單朝諡襄為單襄公

襄公五世孫單旗諡穆為單穆公

單伯輿諡靖為單靖公

尹圉諡文為尹文公

甘過諡悼為甘悼公

樊齊諡頊為樊頊子

甘鱗諡平

太叔帶諡昭為甘昭公 食采於甘

仲山甫諡穆為樊穆仲 食采於樊

按諡與名皆可考者外有密康公即從王游於涇有三

女奔焉者也榮夷公即厲王時芮伯所謂好利者也虢文公即諫王不籍千畝者也諸若詹桓伯甘簡公甘成公甘景公甘桓公成肅公成簡公成桓公單獻公單頃公單成公單武公單平公劉桓公劉康公尹武公原莊公原襄公王叔簡公鞏簡公召武公召戴公召桓公召莊公蘇成公左氏皆不著其名故無可考

周同姓列國君臣謚上

魯君及夫人謚

周公名旦索隱曰謚文見國語 唐武氏追封為褒德王

宋真宗追封為文憲王 愚按父子君臣同謚恐悞

臣子伯禽號魯公無謚

伯禽子西謚考公 西系本作就鄒本作適

西弟熙謚煬公 索隱曰熙一作怡

熙子宰謚幽公 索隱曰宰系本作圉

宰弟潰弑兄而立謚魏公

潰子擢謚厲公 索隱曰擢系本作翟

擢弟具謚獻

具子湏謚真公 索隱曰真系本作慎

湏弟敖謚武公 敖子戲謚懿公

戲兄伯御弑弟自立宣王討其罪而誅之故無謚

戲弟稱謚孝公

稱子不湟一云弗湟謚惠公 繼室謚聲子

惠公元妃孟子無謚先惠公死不得從公謚也繼室謚聲子聲謚子氏也

不湟子息姑謚隱公

息姑弟軌一名允弒兄而立謚桓公 夫人謚文為文姜

軌子同謚莊公 夫人謚哀為哀姜妾謚成為成風

同子啓方一名開謚閔公 一云潘公

索隱曰系本名啓今作開避漢景帝諱

開弟申謚僖 夫人謚聲為聲姜

申子興謚文公 夫人謚哀為哀姜妃謚敬為敬嬴

索隱曰哀非謚以哭而過而魯人哀之故謂之哀姜

興子佞謚宣公 夫人謚穆為穆姜 佞史記作佞上作佞

佞子黑肱謚成公 夫人謚齊為齊姜妾謚定為定姒

黑肱子午謚襄公 夫人謚缺 妾謚齊為齊歸其姊謚

敬為敬歸

午子裊謚昭公 夫人謚缺 裊一作昭

春秋傳昭公薨季孫問於榮成伯曰吾欲為君謚使子孫知之成伯曰生不能事死又惡之以自信也將焉用之乃止

裊弟宋謚定公 夫人謚定為定姒

宋子蔣謚哀公 史記名將

蔣子寧謚悼公 寧子嘉謚元公

嘉子衍一名顯謚穆公 顯子奮謚共公

續文獻通考 卷之三百三十五 三十九朱山

奮子屯一名毛謚康公 屯子偃謚景公

偃子叔一云旅謚平公

旅子賈謚潛公 一作文 賈子讐謚頃公

自哀公而下夫人謚皆無考

按古者婦人俱從夫之謚然自桓文姜而下抑何於此
義戾也豈其行有不盡於夫之謚乎非止魯也觀周景
后之為穆則周固已特謚矣又匹敵有戒至妃娣而皆
加之謚如成風敬嬴之類抑又何說也豈所謂毋以子
貴者耶

魯諸臣謚

公子彊謚僖為臧僖伯 彊孝公子

僖伯子臧孫達謚哀為臧哀伯

哀伯孫臧孫辰謚文為臧文仲

文仲子臧孫許謚宣為臧宣叔

宣叔子臧孫紇謚武為臧武仲

慶父謚共為共仲

慶父子公孫敖謚穆為穆伯

敖子公孫穀謚文為文伯

穀子仲孫蔑謚獻為孟獻子

蔑子仲孫速謚莊為孟莊子

速子孟孫羯謚孝為孟孝伯

蔑孫子服椒謚惠為子服惠伯

續文獻通考 卷之三百三十五

椒子子服回謚昭為子服昭伯

回子子服何謚景為子服景伯

叔牙孫叔仲彭生謚惠為叔仲惠伯 為襄仲所殺

彭生子叔仲帶謚昭為叔仲昭伯

帶子叔仲小謚穆為叔仲穆子

叔牙弟季友謚成為成季 友莊公同母弟

季友子季孫行父謚文為季文子

行父子季孫宿謚武為季武子

宿庶子季孫紇謚悼為季悼子

紇子季孫意如謚平為季平子

意如子季孫斯謚桓為季桓子

斯子季孫肥謚康為季康子

仲孫捷謚敬為孟敬子

仲孫矍謚僖為孟僖子

矍子仲叔何忌謚懿為孟懿子

何忌子仲孫彘謚武為孟武伯

彘子南宮适謚敬為南宮敬叔

叔孫得臣謚莊為叔孫莊叔

得臣子僑如謚宣為叔孫宣伯

僑如弟叔孫豹謚穆為穆叔

豹庶子叔孫婁謚昭為叔孫昭子

婁子叔孫不敢謚成為叔孫成子

成子

子

子

不敢子叔孫州仇謚武為叔孫武叔

州仇子叔孫舒謚文為叔孫文子

公子遂謚襄為東門襄仲 遂莊公之子

施叔謚孝為施孝叔佚名

公孫嬰齊謚聲為子叔聲伯

嬰齊孫叔弓謚敬為敬子

展喜謚莊為展莊叔

榮駕鵝謚成為榮成伯

子家羈謚懿為子家懿伯

一作子家駒

莊公之玄孫

公父歆謚文為公父文伯

歆季桓子從父昆弟

公子展謚夷伯

叔孫舍謚昭為叔孫昭伯

野洩謚聲為野聲子

臧孫賜謚昭為臧昭伯 賜臧為之子

郈惡孝公之後稱厚氏謚昭為郈昭伯

厚齊謚成為厚成叔

季昭子佚名

衛君及夫人世子謚

康叔名封武王同母少弟

按會編食采於康故曰康叔

非謚也

康叔子牟謚康

索隱曰系本康伯名髡宋忠曰即王孫牟也譙周史考

無康伯而云子牟伯立蓋以父子不宥同謚故因其名

曰牟伯

牟子謚考伯

考伯子謚嗣伯

嗣伯子謚康伯

系本作擊伯

康伯子謚靖伯

靖伯子謚貞伯

貞伯子謚頃侯

頃侯賂周始命為侯

頃侯子謚釐侯

釐侯少子和謚武公

和子楊謚莊公

夫人謚莊為莊姜又娶於陳謚厲為厲

媯其娣謚戴為戴媯

楊子完謚桓公

完弟州吁弑兄自立無謚

完弟晉謚宣公

夫人謚宣為宣姜即齊女配伋而公取

之者也生公子壽及朔公之庶母謚夷為夷姜即公所
烝也是生伋

晉子朔謚惠公

晉子黔牟無謚即伋之弟

朔子赤謚懿公

黔牟弟昭伯頑之子申謚戴公

頑烝於宣姜生申及燬

申弟燬謚文公

燬子鄭謚成公

鄭子遯謚穆公

遯子臧謚定公

夫人謚定為定姜妾謚敬為敬妣

臧子衎謚獻公

衎史記作行

獻公出奔衛人立其弟狄為甯喜所殺謚殤公

班氏云

獻公弟狄左傳作剽

衍子惡諡襄公 夫人諡宣為宣姜

惡庶子元諡靈公

左傳靈公柩出城外馬止不行就葬焉下有石槨銘曰
不逢其子靈公奪我里孔子曰靈公之為靈久矣哉

元子蒯瞶之子輒無諡號出公

按衛有孝公能以公養之禮待孔子而世家不載或者
以為出公輒也然出公據國拒父豈得為孝乎以輒為
孝諡之不經甚矣

元子蒯瞶為已氏所殺諡莊公 襄公孫班師無諡

公子起無諡 服虔曰起靈公之子

元次子黔諡悼公 系本作虔

黔子弗諡敬公 史本作敬公費

弗子糾諡昭公 公子慶弒昭公代立諡懷公

弗之孫頹弒懷公代立諡慎公

頹父公子適適父即敬公

頹子訓諡聲公 訓索隱作馴系本作聖公融

訓子遨貶號曰侯諡成侯 遨系本作 逝

遨子諡平侯

平侯子嗣君貶號曰君 索隱曰樂資據紀年以嗣君即

孝襄侯

嗣君子朝魏囚殺之諡懷君

嗣君弟諡元君 班氏云元君者懷君之弟

續文獻通考 卷之二百三十五 十三 二百七十九

元君子角秦廢為庶人無謚 衛亡 衛侯世子餘謚共伯其妻守義謚共姜

衛臣謚

宣公子頑謚昭為昭伯

成公弟叔武謚夷為夷叔

甯靜謚穆為甯穆仲

靜子速謚莊為甯莊子

速子俞謚武為甯武子

孫良夫謚桓為孫桓子

孫林父謚文為孫文子

石稷謚成為石成子

稷子買謚共為石共子

買子惡謚悼為石悼子

甯殖謚惠為甯惠子

殖子喜謚悼為甯悼子

北宮适謚懿為北宮懿子

北宮适孫佗謚文為北宮文子

太叔儀謚文為太叔文子

太叔疾之父謚懿為太叔懿子

太叔疾謚悼為太叔悼子

疾弟太叔遺謚僖為太叔僖子

王孫賈子齊謚昭為昭子

續文獻通考 卷之二百三十五 十四 二百八十

史狗諡文為衛文子

孔達諡莊為孔莊叔

孔達孫孫烝鉏諡成為孔成子

孔烝鉏曾孫圉諡文為孔文子

公孫枝諡文為公叔文子

檀弓云公孫枝卒其子成請於君曰日月有時將葬矣

請所以易其名者衛君曰昔者衛國有饑夫子為粥以

食貧者可不謂惠乎衛國有難夫子以身衛寡人可不

謂貞乎夫子修其班制以與鄰國交使衛之社稷不辱

可不謂文乎故謂夫子貞惠文子

按公孫枝既諡貞惠文矣而單以文行者豈其君諡之

而輿論未之從與抑古人尚質雖三諡而止舉其一與

公孫彌牟諡文為公孫文子

公叔發諡文為公叔文子

公子要諡懿為公叔懿子

褚師比父諡定為褚師定子 失名

褚師比諡聲為褚師聲子

鄔盼諡武為鄔武子

北宮喜諡貞為北宮貞子

析朱鋤諡成為析成子

左傳昭公二十年衛靈公因齊豹之亂出奔於外既復

國賜北宮喜諡曰貞子賜析朱鋤諡曰成子而以齊氏

之墓予之以北宮喜能滅齊豹而朱鋤能宵從竇出以從公也生謚始見此

石祁子 失名

孫莊子 失名

中行敬子 失名

鍼莊子 失名

孫昭子 失名疑即王孫齊

昭子 失名食采於戚

蔡君太子謚

蔡叔度武王弟以與管叔流言作亂無謚

叔度子蔡仲名胡

蔡仲子蔡伯名荒

蔡伯子宮侯 已上無謚

宮侯子謚厲侯

厲侯子謚武侯

武侯子謚夷侯

夷侯子所事謚釐侯

所事子興謚共侯

興子謚戴侯

戴侯子措父謚宣侯

措父子封人謚桓侯

封人弟獻舞謚哀侯

獻舞子盼謚穆侯 史記作繆

盼子甲午謚莊侯

甲午子申謚文侯

申子同為太子般所弑謚景侯

一云申子固

同子般楚靈王誘殺之謚靈侯

同少子廬謚平侯 系本曰平侯靈侯之孫太子友之子

廬子朱立出奔無謚

般孫東國謚悼侯

東國弟申謚昭侯 與文侯同名疑悞

申子朔謚成侯 或作景侯

朔子產謚聲侯

產子謚元侯

元侯子齊無謚

齊出亡蔡滅

靈侯太子友謚隱為隱太子

友左傳作有

蔡臣謚可考者一人

歸生謚聲為聲子

曹君謚

振鐸武王弟無謚

振鐸子太伯脾

脾子仲若平

平子宮伯侯

已上皆無謚

侯子雲謚孝伯

雲子喜謚夷伯

喜弟彊戴伯弒之謚幽伯

彊弟蘇弒幽伯立謚戴伯

蘇子兕謚惠伯 一名雉

兕子武殺兕石甫自立謚繆公

武子終生謚桓公 一作終涅

終生射姑謚莊公 一名夕姑

射姑子羈立為戎所逐無謚

射姑子庶子赤又名夷謚釐公

夷子班謚昭公

班子襄謚共公

襄子壽謚文公

壽子廬謚宣公

史記名廬

廬弟負芻謚成公

負芻子勝謚武公

勝子須謚平公 一名頃

須子午朝于宋卒謚悼公

午弟野隱公弒之謚聲 一謚襄

須弟通為露所弑諡隱公 野弟露諡靖公

按系本及春秋傳悼伯卒弟露立諡靖公實無隱公聲公

露子伯陽滅於宋無諡

晉君夫人世子諡

叔虞成王弟始封唐侯無諡

叔虞子燮都於晉為晉侯無諡

燮子寧族諡武侯

寧族子服人諡成侯

服人子福諡厲侯

系本名輻

福子宜白諡靖侯

宜白子司徒諡僖侯

司徒子籍諡獻侯

系本及譙周皆作蘇

籍子費生諡穆侯

費或作費或作弗

費生弟殤叔自立諡殤侯

費生子仇襲殤叔立諡文侯

仇子伯諡昭侯

伯為臣潘父所弑

伯子平諡孝侯

平為莊伯鯀所弑

平子邾號鄂侯

居於鄂故名 一云邾平之弟

邾子光諡哀侯

光為曲沃武公所弑

光子為小子侯武公弑之無諡

光弟緡為晉侯武公弑之無諡

昭侯至此絕嗣

昭侯叔父成師始封曲沃諡桓叔

成師子鯀諡莊伯

鯀子稱始為晉侯諡武公

紀文獻通考 卷之三百三十五 三十三陸本

稱子詭諸諡獻公 詭諸子夷吾諡惠公

夷吾子圉諡懷公 初公質於秦以女妻之是為懷嬴夷

吾逃秦復以妻文公生公子樂又曰辰嬴辰一作諡

詭諸子重耳諡文公 納秦穆公之女是為文嬴

重耳子驪諡襄公 夫人諡穆為穆嬴

驪子夷臯趙穿弑之諡靈公

驪弟黑臀諡成公 黑臀子儒一名據諡景公

據子州蒲一名壽曼樂書中行偃使人弑之諡厲公

驪曾孫周諡悼公 一云驪孫

周子彪諡平公 彪子夷諡昭公

夷子去疾諡頃公 一云

去疾子午諡定公 午子鑿又名錯為出公無諡

夷曾孫驕諡哀公

驕子抑為盜所弑諡幽公 史記名柳

抑子止諡烈公 年表云魏誅幽公立其弟止

止子頎諡孝公

頎子俱酒諡靜公 系本各俱 是時三家分地晉亡

獻公世子申生諡共太子 襄公少子捷諡桓公

捷子談諡惠伯

昭公少子雍諡戴子 系本作桓子

晉臣諡

趙成子父諡共為共孟 失名

續文獻通考 卷之三百三十五 十九

趙衰謚成爲趙成子 衰子盾謚宣爲趙宣子

盾子朔謚莊爲趙莊子 朔子武謚文爲趙文子

武子成謚景爲趙景子 成子鞅謚簡爲趙簡子

鞅子無恤謚襄爲趙襄子 襄子兄伯魯之子周封爲代

成君成疑謚

趙浣謚獻爲趙獻子 即代成君子襄子立爲太子

無恤弟嘉謚桓爲趙桓子 系本作無恤子

欒枝謚貞爲欒貞子

欒書謚武爲欒武子 書子欒黶謚桓爲欒桓子

欒黶子欒盈謚懷爲欒懷子 欒成之謚共爲欒共叔

卻缺謚成爲卻成子 卻克謚獻爲卻獻子 卻犇從父兄

卻犇謚成爲苦成叔 食采於苦 荀林父謚桓爲中行桓子

林父子庚謚宣爲宣伯 林父孫偃謚獻爲中行獻子

偃子吳謚穆爲中行穆子 吳子寅謚文爲中行文子

林父弟首謚莊爲智莊子 首子智瑩謚武爲智武子

瑩子盈謚悼爲智悼子 盈子躒謚文爲中行文伯

躒子瑤謚襄爲智襄子

隨會謚武爲隨武子 會食采于范因爲范氏

會子士燮謚文爲范文子 燮子士匄謚宣爲范宣子

士匄子士鞅謚獻爲范獻子

士鞅子吉射謚昭爲范昭子

宣子之孫士匄謚文爲士文伯 與祖名同恐史誤

士文伯子彌牟諡景為士景伯

鞏朔諡莊為士莊伯 未詳其世

士渥濁諡貞為士貞子 渥濁子士弱諡莊為士莊子

韓侯裔孫萬事晉諡武為韓武子

韓萬孫簡諡定為定伯 簡子與諡武為韓武子

簡孫厥諡獻為韓獻子 厥子無忌諡穆為公族穆子

厥子起諡宣為韓宣子

起子諡貞為韓貞子 失名

索隱曰系本作平子名頃又云景子

貞子之子不佞諡簡為韓簡子 不佞左傳作不信

不佞子諡莊為韓莊子

徐廣曰史記無簡子莊子而云貞子生康子 索隱曰

按系本有簡子名不信莊子名庚趙世家則有簡子名

不佞

莊子之子虎諡康為韓康子

虎子啓章諡武為韓武子

續鞠居諡簡為續簡伯 士魴諡共為魏共子

魏頡諡文為令狐文子 畢萬子魏犇諡武為魏武子

犇之子諡悼為魏悼子 失名

索隱曰系本云武仲生莊子絳無悼子

悼子之子絳諡莊為魏莊子 史記云諡昭

絳子魏舒諡獻為魏獻子 絳子史記作魏驪之子



索隱曰系本云獻子名荼莊子之子無魏嬴

舒子魏侈謚簡為魏簡子 史記後無謚

索隱曰侈亦作哆系本獻子生簡子取取生襄子多左
傳曰魏曼多是也則侈是多之訛耳

侈子魏曼都謚襄為魏襄子

侈孫魏駒謚桓為魏桓子 索隱曰系本襄子生桓子

驪之子魏錡謚武為蔚武子

錡子呂相謚宣為呂宣子 樂王鮒謚桓為樂桓子

智宣子 失名

續文獻通考卷之二百三十五終

續文獻通考卷之一百三十六

皇明進士雲間王圻纂輯

謚法考 周同姓列國謚下至異姓列國謚

鄭君夫人謚

厲王少子友封于鄭為犬戎所殺謚桓公

友子掘突謚武公 夫人謚武妻

掘突子寤生謚莊公 夫人謚莊姜

寤生子忽為高渠彌所弑謚昭公

忽弟突謚厲公 與祖同名史誤

突弟子亶無謚 子亶為高渠彌所立齊人殺之

忽弟子儀立為傅瑕所殺無謚

續文獻通考卷之二百三十六

突子捷謚文公 捷一作躒

捷子蘭謚繆公 蘭子夷為歸生所弑謚靈公

夷庶弟堅謚襄公 年表作靈公庶兄

堅子費謚悼公 史記作潰又作弗又作沸

費弟踰謚成公

踰子憚又名髡頑子駟弑之謚僖公

憚子嘉謚簡公 嘉子寧謚定公

寧子蠆謚獻公 蠆子勝謚聲公

勝子易謚哀公 勝弟丑謚共公

丑子巳謚幽公

左傳鄭子家卒鄭人討幽公之亂斲子家之棺而逐其

族改葬幽公謚之曰靈

按史記幽公元年韓武子伐鄭殺幽公是幽公見殺於武子非被弑於子家也且幽公亦不聞改謚此直謂靈

公左氏適誤耳

巳弟駘號孺公 孺或作繚

駘弟乙謚康公 史記作鄭君無謚

鄭臣謚可考者六人

公孫舍之謚桓 公子發即子產父謚惠

國參字子思子產子謚桓

公父定叔叔段之孫謚定 失名

皇武子 失名 疑即武子賸

續文獻通考 卷之二百三十一 二百六十四共

燕君謚

召公奭謚康公子封比燕伯康公九世孫謚惠侯

惠侯子謚釐侯釐侯子謚頃侯

頃侯子謚哀侯

哀侯子鄭侯索隱曰謚法無鄭鄭是名也

鄭侯子謚繆侯繆侯子謚宣侯

宣侯子謚桓侯桓侯子謚莊公

莊公子謚襄公

襄公子謚桓公譙周曰系家襄伯生宣公無桓公

桓公子謚宣公宣公子謚昭公

昭公子謚武公武公子謚文公

文公子謚懿公懿公子謚惠公

惠公子謚悼公悼公子謚共公

共公子謚平公平公子欵謚簡公

簡公子謚獻公始入春秋

索隱曰王邵按紀年簡公後次孝公無獻公

獻公子謚孝公孝公子載謚成公

成公子謚閔公史記作湣公

閔公子謚釐年表作釐侯莊徐廣曰一無莊字

釐侯子謚桓公桓公子謚文公

徐廣曰古史考世家自宣侯以下不說其屬以其難明也今依天運紹統所載世次以備考

文公子僭稱王謚易王 易王子噲無謚

噲子平謚昭王 昭王子謚惠王

惠王子謚武成王 武成王子謚孝王

孝王子喜為太子丹事滅於秦無謚

按左傳燕有南北南燕姑姓北燕即召公之所封也如昭三年書北燕伯欵出奔齊莊二十年書執燕仲父注云即南燕伯而史記乃共一世家豈司馬氏別有據歟又左傳有召莊公奭之子簡公盈與北燕簡公欵而世家獨有一簡公豈即左傳所謂北燕伯與又有召穆公

虎即江漢之詩所稱平淮南之夷者也而世家亦無之第有繆侯豈穆即繆歟錄以俟考古者

韓君謚 韓之先與周同姓苗裔韓武子事晉世為晉卿九世孫虔始分晉列於諸侯

韓侯虔謚景侯

虔子取謚烈侯 烈系本作武史記作列

烈侯子謚文侯 文侯子為韓嚴所試謚哀侯

哀侯子若山謚懿侯 索隱曰年表作莊侯

懿侯子謚昭侯 又作鄭釐侯索隱曰紀年魏武侯二十

三年晉桓公邑哀侯於鄭是韓既徙都因改號曰鄭故戰國策謂韓惠王為鄭惠王

昭侯子僭稱王謚宣惠王

索隱曰紀年鄭昭侯武薨次威侯立此系家即以為宣惠王則韓微國小史失世代耳

按史記昭侯十年韓姬弒其君悼公不知悼公何君

宣惠王子倉謚襄王

倉子咎謚釐王

釐王子謚桓惠王

桓惠王子安滅於秦無謚

魏君謚

魏之先畢公高之後與周同姓苗裔畢萬

事獻公世為晉卿至十世孫斯始分晉列於諸侯

魏侯斯謚文侯

斯史記作都 系本桓子生文侯斯

斯子擊謚武侯

擊子釐僭稱王謚惠王

紀年作惠成王按紀年起自黃帝終於魏之今王今王者魏惠成王

子太史公但言惠王據此則紀年或不誤

釐子赫謚襄王

赫系本作嗣 赫子謚哀王

索隱曰系本襄王生昭王而無哀王蓋脫一代耳

哀王子謚昭王

索隱曰系本名漱

昭王子謚安釐王

索隱曰系本名圍

安釐王子增謚景閔王

景閔王子假滅於秦無謚

滕君謚

滕侯嬰齊文王子叔繡之後謚宣公

嬰齊子毛謚昭公

毛子繡謚文公

繡子原謚成公

原子寧一名道謚悼公

道子結謚頃公

虞母謚隱公

定公 失名

定公子謚文公 失名

中山公謚

中山古鮮虞國姬姓謚武 失名

徐廣曰中山公西周桓公子桓公者考王弟而貞定王子也

周異姓列國君臣謚

齊君夫人謚

太公姓姜從其封姓故曰呂尚始封於齊無謚 唐肅宗

乾元三年封為武成王宋真宗大中祥符元年封為昭

烈武成王 譙周曰名牙一作字牙名尚

太公子伋謚丁公 徐廣曰伋一作及

丁公子乙公得

乙公子癸公慈母 二公無謚

按太公子丁公丁公子乙公乙公子癸公蓋猶用殷法以生日名子謚法乃後人依託遂以述義不克曰丁耳不然何故無乙癸之謚法乎乃知丁乙癸皆非謚也

癸公子不辰謚哀公 系本作不臣為周夷王所烹

不辰弟靖謚胡公 不辰弟山弒胡公立謚獻公

山子壽謚武公 壽子無忌國人弒之謚厲公

無忌子赤謚文公 赤子說謚成公 說史記作脫

說子購謚莊公 購子祿父謚釐公

祿父子諸兒謚襄公 祿父弟之子無知弒君無謚

諸兒弟小白謚桓公 夫人謚共為共姬

小白子無詭被弒無謚 小白子昭謚孝公

小白子潘謚昭公 潘子舍謚殤公

小白子商人謚懿公 小白子元謚惠公

元子無野謚頃公

無野子環謚靈公 夫人謚聲為聲孟子又娶於魯謚懿

為懿姬其妃謚聲為聲姬又納魯叔孫宣伯之女謚穆

為穆孟姬

環子光崔杼弒之謚莊公 光弟杵臼謚景公

杵臼子荼號晏孺子

杵臼子陽生鮑牧弒之謚悼公

陽生子壬陳恒弒之謚簡公 年表云景公子

壬弟騫謚平公 騫子積謚宣公

積子貸謚康公 康公立二十六年卒呂氏祀絕

齊臣謚

田完謚敬為陳敬仲 完孫湣謚莊為孟莊子

湣子須無謚文為陳文子 須無子無宇謚桓為陳桓子

無宇子開謚武為陳武子 無宇子田乞謚釐為田釐子

乞子恒謚成為陳成子

昭子莊簡子齒宣子夷穆子安廩丘子意茲芒子盈惠

子德 七人俱成子兄弟 廩丘子音茲芒子盈系本

作廩丘子尚鑿茲子芒盈

恒子田盤謚襄為田襄子

徐廣曰盤一作暨系本作班

盤子田白謚莊為田莊子

索隱曰系本名伯

白子謚悼為田悼子

夫名

此後代齊有國為田齊

管仲謚敬為敬仲

國歸父謚莊為國莊子

國佐謚武為國武子

佐孫弱謚景為國景子

國夏謚惠為國惠子

晏弱謚桓為晏桓子

弱子嬰謚平為晏平仲

鮑叔牙曾孫牽謚莊為鮑莊子

鮑牽弟國謚文為鮑文子

高偃謚敬為高敬仲

高張謚昭為高昭子

高固謚宣為高宣子

樂桓子

夫名

崔杼謚武為崔武子

析歸父謚文為析文子

杞君謚

東樓公姒姓禹之後周武王始封

索隱曰東樓公謚號也

東樓公子西樓公

西樓公子題公

題公子謀娶公 已上俱無謚

謀娶公子謚武公

武公子謚靖公

靖公子謚共公

共公子謚德公

徐廣曰系本作惠公

德公子謚成公

德公弟姑容謚桓公

系本作成公弟

姑容子句謚孝公

句弟益姑謚文公

益姑弟郁釐謚平公 郁釐二作鬱來

郁釐子成謚悼公 成子乞謚隱公

乞弟遂弒兄自立謚釐公 遂子維謚潛公

維弟闕路謚哀公 譙周二云謚懿

維子敕號出公 敕一作漵 敕子春謚簡公

宋君謚

微子開一名啓子姓周武王始封以奉商祀無謚 元至

元六年封仁靖公

啓弟微仲衍無謚 宋公稽無謚

稽子申謚丁公 申子共謚潛公

共弟熙爲鮒祀所弒謚煬公

熙弟鮒祀弒兄自立謚厲公 徐廣曰鮒一作鮒

鮒祀子舉謚僖公 舉子覲謚惠公

覲子謚哀公 失名 哀公子謚戴公 失名

戴公子司空謚武公 司空子力謚宣公

力弟和謚穆公 力子與夷華督弒之謚殤公

和子馮謚莊公 馮子捷南宮萬弒之謚閔公

新君游遇弒無謚 捷弟御說謚桓公

御說子茲甫謚襄公 茲甫子王臣謚成公

王臣子杵臼衛伯弒之謚昭公 一云襄公子

杵臼弟鮑革謚文公 鮑革子瑕謚共公 一名固

瑕子成謚平公 成子佐謚元公

佐子欒又名頭曼謚景公

佐曾孫特弒景公太子自立謚昭公特一作得

特子購由謚悼公購由子田謚休公

田子辟兵號辟公紀年作桓侯璧兵則辟公謚桓矣

辟兵子剔成弟偃弒之無謚

剔成弟偃僭稱王立四十七年而宋亡

索隱曰戰國策呂氏春秋皆以偃謚康王

宋夫人謚之可考者惟共公夫人為共姬襄公夫人為

襄夫人元公夫人曹氏謚景餘無考

陳君及太子謚

陳侯滿媯姓周武王始封謚胡

滿子犀謚申公犀弟臯羊謚相公

犀子突謚孝公突子圉戎謚慎公

圉戎子寧謚幽公寧子孝謚僖公

孝子靈謚武公靈子說謚夷公

說弟爨謚平公爨子圉謚文公

圉長子鮑謚桓公鮑弟佗謚厲公

鮑子躍謚利公

按索隱曰左傳桓公五年文公子佗殺桓公太子免而代立經六年蔡人殺陳佗立桓公子躍為厲公佗立未踰年故無謚史記以佗為厲公遂以躍為利公是太史公誤耳而譙周乃以厲公為桓公弟又誤也

紀文獻通考卷之二十三 三十一

躍弟林謚莊公

林弟杵臼謚宣公

欵子朔謚共公

朔子平國為夏徵舒所弑謚靈公

平國子午謚成公

弱孫吳謚惠公 即悼太子之子

吳子柳謚懷公

哀公太子偃師謚悼

按左傳哀公元妃鄭姬生悼太子偃師則為一人耳史

記世家乃云哀公娶鄭長姬生悼太子師少姬生偃師

又為二人矣史記當誤諸夫人謚無考

陳臣謚可考者三人

轅濤塗謚宣為轅宣仲

公孫貞子謚貞失名

司城貞子 即孟子所謂主司城貞子是也 以宋大夫而

奔於陳者亦失名

許君謚

文叔姜姓四岳伯夷之後武王始封

伯封

德男 靖男

孝男 武公

康男 興父弟謚莊公

興父謚文公 新臣謚穆公

鄭謚桓公

業謚僖公

業子錫我謚昭公

錫我子寧謚靈公

寧子買謚悼公

買子成謚元公

薛君謚 薛本任姓黃帝之後夏封奚仲于薛

薛侯穀謚獻公

穀子定謚襄公

定子夷謚惠公

成侯

邾君謚 邾顓頊之後周武王始封曹挾於邾至克

見春秋

邾子克謚莊公

克子瑣無謚

瑣子遽蔭謚文公

遽蔭子矍且謚定公

矍且子慆謚宣公

慆子華謚悼公

華子穿謚莊公

穿子益姑謚隱公

益姑子葦謚桓公一謚威公

邾後改為鄒鄒有穆公九孟子

邾臣謚可考者一人

茅夷鴻謚成爲茅成子

小邾君謚 即邾之別封故稱小終春秋有謚者僅

見一君

邾黎來謚穆公

莒君謚號 莒之先少昊之後周武王始封茲輿期

於莒十一世至茲丕公見春秋

茲丕公 莒夷無謚多以號爲稱

紀公庶其

紀公子季陀曰厲公

渠丘公朱

犁比公密州

犁比號也又名買朱鉏

著丘公去疾犁比公長子因展與弒父奔齊展與犁比公

次子弒父自立後以去疾返國奔吳

郊公狂著丘公子父死弗戚國人攻之奔齊

狂一作任

共公庚與著丘公弟國人患其虐逐之奔魯

萊君謚

齊東國鄙邑又謂之萊夷

萊子浮柔謚共公

右薛邾莒萊春秋或書其謚或書其名或書其號號名非謚也今并載之以備參攷至夫人與大夫謚春秋益

畧之無可錄矣

趙君謚

趙之先與晉共祖苗裔叔帶始事晉文侯

建氏于晉國叔帶以下五世而生趙夙夙十二世

孫籍分晉始列于諸侯

趙侯籍趙獻子浣之子謚烈侯

烈侯弟謚武侯

烈侯子章謚敬侯

章子種謚成侯

成侯子言謚肅侯

系本肅侯名語

肅侯子偕稱王謚武靈王

納吳侯之女娃嬴是為孟姚

孟姚有寵卒謚惠后

索隱曰武靈王名雍史記作定

按史記王嘗夢見處女鼓瑟而歌異日王飲酒樂數言

所夢想見其狀吳廣聞之因夫人而納其女娃嬴即孟姚也孟姚甚有寵於王是為惠后又曰惠文王惠后吳娃嬴子也則惠后信為孟姚矣乃索隱又謂武靈王之

后前太子章之母惠文王之嫡母惠后卒後吳娃始當

正室至孝成二年稱惠文后卒是也則此惠后又非孟姚並存之以備考

武靈王子何謚惠文王

何子丹謚孝成王

丹子偃謚悼襄王

徐廣曰潛王世本云孝成王丹生悼襄王偃偃生今王

遷年表及史考遷皆無謚 索隱曰徐廣云王遷無謚今惟此獨稱幽繆王者蓋秦滅趙之後人臣竊追謚之

太史公或別有所見而記之也

遷子嘉為代王滅於秦無謚

田齊君謚

齊侯田和莊子之子號太公

和子午謚桓公

午子因齊僭稱王謚威王

因齊子辟疆謚宣王

辟疆子地謚潛王 一名遂

地子法章謚襄王

法章子建滅於秦無謚

威王少子田嬰謚靖郭君

嬰子田文謚孟嘗君

按索隱曰孟嘗襲父封薛號孟嘗君此云謚非也孟嘗是邑名正義曰四君封邑檢皆不獲惟平原有地又非

趙境蓋並為號而孟嘗謚也二說亦相牴牾今兩存之

楚君謚 楚自熊繹始封至十七世武王而有謚

熊通弑兄蚡冒之子代立謚武王

按史記楚武王三十五年楚伐隨謂隨請王室尊吾號王室不聽熊通怒曰我自尊耳乃自立為武王則武是號非謚也

熊通子熊貲謚文王

熊貲子熊囂是為杜敖無謚

熊囂弟熊惲為太子商臣所弑謚成王

左氏作熊頹

左傳商臣以宮甲圍成王請食熊蹯而死不聽丁未王謚謚之曰靈不暝曰成乃暝

熊惲子商臣弑父代立謚穆王

商臣子侶謚莊王

侶一作旅

侶子審謚共王

左傳共王疾告大夫曰不穀不德少主社稷生十年而喪先君未及習師保之教訓而膺受多福是以不德而亡師於鄢以辱社稷為大夫憂其弘多矣若以大夫之靈獲保首領以歿於地惟是春秋窳窳之事所以從先君於禰廟者請為靈若厲大夫擇焉莫對及五命乃許秋共王卒子囊謀謚大夫曰君有命矣子囊曰君命以共若之何毀也赫赫楚國而君臨之撫有蠻夷奄征南海以屬諸夏而知其過可不謂共乎請謚之共大夫從之

審子招謚康王 招子員是為邾敖無謚

招弟圜謚靈王 一名虔餓死申亥之家

審子棄疾改名熊居謚平王 以詐弒靈王及新王自立

熊居子珍謚昭王 珍子章謚惠王

章子中謚簡王 中子當謚聲王

當子類謚悼王 類史記作疑

類子臧謚肅王

臧弟熊良夫謚宣王 一云臧子

良夫子熊商謚威王 熊商子熊槐謚懷王

熊槐子橫謚頃襄王

橫子熊元謚考烈王 系本作完

熊元子悼謚幽王 一云名悍

悼弟猶謚哀王 猶一作赫

猶庶兄負芻殺猶自立滅於秦無謚

楚屬國君謚

鄧侯曼姓謚祁 失名

唐侯姬姓謚成

唐侯謚惠 二君世次與名俱失

秦君謚 秦自栢駮始封歷非子秦侯公伯秦仲皆

無謚至莊公而始謚

秦仲子以伐西戎為大夫謚莊公

莊公子以禦戎功封為侯謚襄公

襄公子謚文公

文公孫謚寧公

寧公少子被弑號出子

寧公長子謚武公

武公弟謚德公

德公子謚宣公

宣公弟謚成公

成公弟任好謚穆公

夫人謚穆姬

穆史記作繆

穆姬晉女也在晉曰伯姬伯謂長女也在秦曰穆姬從

夫之謚也嫁於小國則不從夫之謚如紀伯姬郊作姬

潞伯姬是也次國亦不從夫之謚如文姜聲姜出姜齊

姜齊歸是也其有叔姬者各據本國次序也

任好子瑩謚康公

瑩子和謚共公一名假

和子榮謚桓公史記無名

榮子后謚景公

史記無名系本云名后伯車

后子謚哀公

一作襄公始王本紀作瑋公

哀公孫謚惠公

即哀公太子夷公之子

惠公子謚悼公

悼公子謚厲共公

厲共公子謚躁公

躁公弟被圍自殺謚懷公

懷公孫謚靈公

懷公子名悼子謚簡公

索隱曰簡公懷公子靈公季父始皇本紀云靈公生簡公誤也

簡公子謚惠公

紀年云簡公卒次敬公二十二年卒乃

立惠公

惠公子被殺號出子

靈公子師隰謚獻公

獻公子渠梁謚孝公

續文獻通考 卷之二

孝公子僭稱王謚惠文君名駟

惠文君子謚武王 索隱曰名蕩

武王弟稷謚昭襄王 一名則

昭襄王子柱謚孝文王 孝文王子楚謚莊襄王

莊襄王子政立為始皇帝除謚法

文公太子謚靖公 懷公太子謚昭公

哀公太子謚夷公 昭襄王太子謚悼

陳王勝謚

陳王勝字涉陽城人秦二世元年起斬大澤中立為將軍

已立王號張楚後其御莊賈殺以降秦葬於碭謚隱王

續文獻通考卷之一百三十六終

